

**Ai 29 di jugn
SS. PIERI E PAULI, APUESTUI
Solenitât**

Pieri, sielzût di Crist a fonde dal edifizi eclesiâl, vuardean des clâfs dal ream dai cîi (Mt 16,13-19), pastôr dal trop sant (Zn 21,15-17), confermadôr dai fradis (Lc 22,32), al è inte sô persone e intai siei sucessôrs il segnâl visibil de unitât e de comunion inte fede e inte caritât.

Pauli, agregât al colegio apostolic di Crist in persone su la strade di Damasc (At 9,1-16), strument sielzût par puartâ il so non denant dai popui (At 9,15), al è il plui grant missionari di ducj i temps, l'avocat dai paians, l'apuestul dai forescj, chel che dutune cun Pieri al fâs risunâ il mes dal Vanzeli intal mont mediterani. Ducj i doi i apuestui a sigilarin cul martueri a Rome, viers l'an 67, la lôr testemoneance al Mestri. La «Depositio martyrum» (354) e ripuarte la lôr solenitât ai 29 di jugn.

Inte Messe dal dì

Antifone di jentrade

A son chescj che, inte lôr vite, a àn plantade la Glesie cul lôr sanc:
a àn bevût il cjaliç dal Signôr e a son deventâts amîs di Diu.

Si dîs Glorie a Diu.

Colete

Diu, che tu âs indalegrade cheste zornade cu la sante gjonde
pe solenitât dai apuestui Pieri e Pauli,
fâs che la tô Glesie e meti simpri in vore l'insegnament
di chei che par prins a àn predicjade la fede.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE At 12,1-11

Cumò mo o soi propit sigûr che il Signôr al à mandât il so agnul par deliberâmi des sgrifis di Erode.

Dai Ats dai Apuestui

In chê volte, il re Erode al metè la sgrife su cualchidun de Glesie par fiscâju. Al copà cu la spade Jacum, fradi di Zuan. Viodint che i Judeus a jerin contentons de robe, al decidè di brincâ ancje Pieri. Si jere tai dîs dal Pan cence levan. Lu cjapà e lu metè in preson, dantlu di vuardeâ a cuatri companiis di cuatri soldâts da l'une, cul intent di menâlu denant dal popul subit passade Pasche. Pieri al jere duncje in preson, biel che la Glesie no sostave di clamâ Diu par lui. Juste in chê gnot che Erode al stave par menâlu denant dal popul, Pieri al durmive vuardeât di doi soldâts e peât cun dople cjadene, e denant de puarte lis vuaitis a tignivin di voli la preson. E ve che un agnul dal Signôr si presentà e une lûs e sfiamià te preson. Al pocà Pieri tal flanc, lu dismovè e i disè: «Jeve sù, spessee!». E lis cjadenis i colarin des mans. I disè indaûr l'agnul: «Metiti la cinturie e peiti i sandui». E al fasè cussì. I disè l'agnul: «Invuluciti te manteline e anìn daûrmi!». Pieri al jessi e i lè daûrji, ma no si jere ancjemò no inacuarzût che al jere vîr ce che i stave sucedint midiant dal agnul. Al crodeve di vê une vision.

A passarin la prime e la seconde vuardie e a rivarin a la puarte di fier che si va in citât. La puarte si spalancâ di bessole denant di lôr. A saltarin fûr e a rivarin fin dapît di une contrade e l'agnul, a colp, lu lassà. Alore Pieri, tornant in sè, al disè: «Cumò mo o soi propit sigûr che il Signôr al à mandât il so agnul a deliberâmi des sgrifis di Erode e di dut ce che al smicjave il popul dai Judeus».

Peraule di Diu.

SALM RESPONSORIÂL dal Salm 33

R. Benedet seial il Signôr che al libere i siei amîs.
O vuei benedî il Signôr cence polse,
la sô laut simpri su la mê bocje.
La mê vite tal Signôr si glorie,
che lu sepin i puars e si indalegrin. **R.**

Laudait cun me il Signôr,
puartìn il so non ducj insieme.
O ài clamât il Signôr e lui mi à dade rispueste,
mi à deliberât di ogni fastidi. **R.**

Cjalaitlu lui e us lusaran i vôi,
lis vuestris musis no varan di deventâ rossis.
Chest biât al à berlât e il Signôr lu à scoltât,
e lu à deliberât di dutis lis sôs penis. **R.**

L'agnul dal Signôr al fâs une trincee
ator di chei che lu rispietin e ju libere.
Cerçait e o viodarêts cetant bon che al è il Signôr:
furtunât l'om che li di lui si pare. **R.**

SECONDE LETURE 2 Tm 4,6-8.17-18

E je za pronte par me la zoe de justizie.

De seconde letare di san Pauli apuestul a Timoteu

Benedet, par chel che mi rivuarde, jo o soi za spandût in libagjon e al è rivât il moment di molâ lis velis. O ài combatude la buine batae, o ài finide la corse, o ài mantignude la fede. Pal rest e je za pronte par me la zoe de justizie, che in chê dì me consegnarà il Signôr, lui che al è un judiç just; e no dome a mi, ma ancje a ducj chei che a àn spietade cun dut il cûr la sô vignude.

Il Signôr però mi à judât e mi à dade fuarce par che midiant di me la predicazion dal vanzeli e rivâs insom e ducj i paians le scoltassin: e cussì o soi stât liberât de bocje dal leon. Il Signôr mi liberarà ancjemò di ogni opare triste e mi salvarà pal so ream dal cîl. A lui la glorie tai secui dai secui.

Amen.

Peraule di Diu.

CJANT AL VANZELI Mt 16,18

R. Aleluia, aleluia.

Tu tu sêts Pieri e sun cheste piere o tirarai sù la mê Glesie
e lis puartis di chel altri mont
no rivaran a vêle vinçude cuintri di jê.

R. Aleluia.

VANZELI Mt 16,13-19

Tu tu sêts Pieri: ti darai a ti lis clâfs dal ream dai cîi.

Dal vanzeli seont Matieu

In chê volte, rivât Jesù te region di Cesaree di Filip, al tacà a interpelâ i siei dissepui disint: «La int cui disie che al sedi il Fi dal om?». I rispuinderin: «Cui al dîs che al sedi Zuan il Batiste, cui Elie, cui Jeremie o un altri dai profetis». Ur disè: «Ma vualtris cui disêso che jo o sedi?». Al cjadà la peraule Simon Pieri e i disè: «Tu tu sêts il Crist, il Fi dal Diu vîf».

I rispuindè Jesù: «Furtunât tu, Simon, fi di Jone, parcè che ni la cjar ni il sanc no tal àn palesât, ma il Pari gno che al è tai cîi. Jo ti dîs: Tu tu sêts Pieri e sun cheste piere o tirarai sù la mê Glesie e lis puartis di chel altri mont no rivaran a vêle vinçude cuintri di jê. Ti darai lis clâfs dal ream dai cîi; dut ce che tu varâs peât su la tiere al sarà peât tai cîi, e dut ce che tu varâs dispeât su la tiere al restarà dispeât tai cîi».

Peraule dal Signôr.

Si dîs O crôt.

Su lis ufiertis

La preiere dai sants Apuestui che e compagni, Signôr,
l'ufierte che o presentìn al to non
e nus dedi la devozion juste par celebrâ chest sacrifici.
Par Crist nestri Signôr.

Prefazi

La dople mission di Pieri e di Pauli inte Glesie

V. Il Signôr cun vualtris.

R. E ancje cun te.

V. Adalt i cûrs.

R. Ju vin viers il Signôr.

V. Vin agrât al Signôr nestri Diu.

R. Al è just e sacrisant.

Al è propit just e sacrisant, al covente e al dà salvece
vêti agrât simpri e dapardut,
Signôr, Pari sant, Diu onipotent e eterni:
Tu tu âs destinât che o fasessin fieste
pai sants apuestui Pieri e Pauli:
un, prin tal confessâ la fede;
chel altri, splendit tal lâ a font dal misteri;
un, cul rest di Israel al à metude sù la prime Glesie;
chel altri, al è stât mestri e dotôr tal clamâ i paians a la salvece.
Cussì, par stradis differentis, a àn dade dongje une uniche famee,
e vint il stes onôr denant dal mont, ju à unîts la stesse corone di glorie.
Par chel, cun ducj i Agnui e i Sants,
ti laudin, disint cence polse:

Sant, Sant, Sant al è il Signôr Diu di dut il mont...

Antifone a la comunion cf. Mt 16,16.18

I disè Pieri a Jesù: Tu tu sêts il Crist, il Fi dal Diu vîf.

I rispuindè Jesù: Tu tu sêts Pieri
e sun cheste piere o tirarai sù la mê Glesie.

Daspò de comunion

Daspò di vénus sostentâts cun chest sacrament,
danus, Signôr, di vivi inte tô Glesie
perseverant tal crevâ il pan e te dutrine dai Apuestui,
in mût di saldâsi tal to bonvolê
e di formâ un cûr sôl e un'anime sole.
Par Crist nestri Signôr.